

TRIBUNA POLITICA

Promoziun da la cultura en il Grischun

DA MARTIN JÄGER,
CUSSEGLIER GUVERNATIV

Cultura è quai che nus pensain, schain, fashain. Cultura è identitad e furma identitad. La societad interpretescha oz la noziun «cultura» en moda e maniera uschè averta sco anc mai. En sia definiziun da cultura illuminescha il cussegl da l'Europa in punct central impurtant, numnadain sia forza reflexiva ed emancipatorica. Questa definiziun sa cloma: «Cultura è tut quai che permetta a l'individui da s'orientar envers il mund, envers la societad ed er envers l'ierta da la patria, tut quai che ha per consequenza che l'uman chapescha meglier sia situaziun per eventualmain la pudair midar.» Cultura è pia quai che resulta tras forza creativa senza intenziuns specificas e che ans tanghescha e stimulescha sco consumentas e consuments da cultura.

Cumpareglià cun auters chantuns svizzers ha la cultura en il chantun Grischun en differents regards ina posiziun speziala. Il svilup individual ed independent da las differentas valladas fin en il 20avel tschientaner ha generà ina gronda diversitad culturala che sa manifestescha il pli fitg en il sector da nossa trilinguitad.



La patria alpina pauc productiva n'ha betg mo pretendì d'adattar la moda da viver a las relaziuns localas, mabain ha er sfurzà blers umans d'ir a gudagnar a l'ester. Da quels ch'èn turnads a chasa ha la cuntrada culturala adina puspè survegnì novs impuls. Sut quest aspect è il Grischun perquai er per la promoziun da la cultura in territori zunt interessant. Cumpareglià cun auters chantuns svizzers n'ha la lavur culturala professiunala – er sut quest aspect – betg pudì sa sviluppar en moda uschè exprimida en il passà. Percunter ha il Grischun ina ferma activitad culturala populara e da laics. Quest svilup tipic caracterisescha anc oz nossa cuntrada culturala grischuna. Sco exempels poss jau menziunar ils chors e las musicas, ma er las numerusas gruppas da teater.

Cultura è spazi da pensar e d'agir. Ma oz vegn ella chapida en moda bler pli averta. Cun la moderna èn s'extendids ils anteriurs «bels arts». Sper l'art figurativ, la litteratura, il teater e la musica èn la fotografia, il film, il saut, ils comics e las novas medias s'establids sco arts independents.

Il chantun Grischun, mes departament, sustegna instituziuns, organisaturas ed organisaturs sco er personas che lavuran sin il champ cultural, cun la finamira da promover l'access a la cultura ed il mantegniment da la cultura. Quai fashain nus oz en tut las dimensiuns da la lavur culturala. Mintga onn survegn mes departament fin 1000 dumondas d'uniuns, d'instituziuns e da personas singulas da tut las spartas.

Il cussegl grond ha incumbensà la regenza da reveder totalmain la lescha per promover la cultura da l'onn 1996. Da questa schanza profitain nus guggent. Jau vegn dentant a m'engaschar ch'ils meds finansials disponibels gajan er en l'avegnir a favur da l'entira cultura grischuna – en tut sia dimensiun e gronda diversitad.